

**Naalakkersuisut suliffeqarfittut innuttaasunik tapersersortarialinnik
suliffissaqartitsisunik nalunaarsugaasut pillugit inatsisissatut siunnersuummik
kingusinnerpaamik UKA2019-mi saqqummeeqqullugit Inatsisartut
aalajangiiffigisassaattut siunnersuut.**

Inatsisartunut ilaasortaq Peter Olsenimit, Inuit Ataqatigiinneersumit saqqummiunneqartoq

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Inuussutissarsiornermut Aatsitassanullu Ataatsimiititaliap suliarinninnermini ilaasortarai:
Inatsisartunut ilaasortaq Jens Danielsen, Siumut, Siulittaasoq
Inatsisartunut ilaasortaq Múte B. Egede, Inuit Ataqatigiit, Siulittaasup tullia
Inatsisartunut ilaasortaq Mala Høj Kuko, Siumut
Inatsisartunut ilaasortaq Henrik Fleischer; Siumut
Inatsisartunut ilaasortaq Randi V. Evaldsen, Demokraatit
Inatsisartunut ilaasortaq Tillie Martinussen, Suleqatigiissitsisut
Inatsisartunut ilaasortaq Peter Olsen, Inuit Ataqatigiit

UKA2018-imi ulloq 8. november 2018-imi siullermeerinninnerup kingorna
Inuussutissarsiornermut Aatsitassanullu Ataatsimiititaliap siunnersuut misissorpaa.

1. Siunnersuutip imarisai siunertaalu

“Suliffeqarfittut innuttaasunik tapersersortarialinnik suliffissaqartitsisutut” taallugit
suliffeqarfinnik namminersortunik qitiusumik nalunaarsuinissamik ajornarunnaarsitsinissaq
siunnersuuteqartup siunnersuuteqarnermigut kissaatigaa. Tamatuma suliffeqarfiit
innuttaasunik tapersersortarialinnik suliffeqartitsisut nalunaarsorneqartarnissaannut
inatsisissatut siunnersuummik suliaqartoqarneratigut qulakkeerneqarnissaa
kissaatigineqarpoq. Suliffeqarfiit namminersortut iluanaarniuteqarnerup nalinginnaasup
saniatigut isumaginninnikkut avatangiisitigullu inuiaqatigiinnut attuumassutilinnik
suliniuteqartut takussaalersinnissaat siuarsarneqarnissaallu siunnersuummi siunertaavoq.

2. Ataatsimiititaliap siunnersuummik suliarinninnera

Siunnersuutip matuma siullermeerinninnermi soqutigineqarluarnera ataatsimiititaliamit maluginiarneqarpoq, pingaartumik isumaginninnikkut periarfissiissutai pillugit. Taamaattorli taaguummik “suliffeqarfik innuttaasunik tapersersortarialinnik suliffeqartitsisumik” sunarpiaq pineqarnerseq isumaliutissiissutikkut matumuunakkut nassuiaatigissallugu pitsaasutut nalilerneqarpoq.

4.1 taaguut “suliffeqarfiit innuttaasunik tapersersortarialinnik suliffeqartitsisut”

suliffeqarfiit innuttaasunik tapersersortarialinnik suliffeqartitsisut inuussutissarsiornikkut ingerlatsinermi – nunatsinniinnaangitsoq - sammisaasut nutaat paasineqarsinnaavoq. Danmarkimi *Suliffeqarfiit tapersersortarialinnik suliffeqartitsisut nalunaarsorneqarsimasut pillugit inatsit nr. 711, 25. juni 2014-imeersoq* sammisamini Europami siullersaavoq. Suliffeqarfik tapersersortarialinnik suliffeqartitsisoq danskit naalackersuisuinit ima erseqqinnerusumik nassuiarneqarpoq:

”Suliffeqarfik namminersortoq - atuunnermigut isaatitsinermigullu – isumaginninnikkut inuiaqatigiinnullu iluaqutaasussanik immikkut ittunik siuarsaanissamik siunertaqarluni inuussutissarsiummik ingerlatsisoq.”¹

Ataatsimiititaliamit siunnersuuteqartoq siullerpaamik iliuuserineqartumit annertuumik isumassarsiorsimasorineqarpoq. Tamanna tunngavigalugu suliffeqarfiit tapersersortarialinnik suliffeqartitsisut qanoq inatsit qulaani pineqartoq naapertorlugu paasineqarnissaat pillugu pissutsit ataantut nalunaarsornissaat ataatsimiititaliamit pitsaasuusorineqarpoq.

Suliffeqarfinnik tapersersortarialinnik suliffeqartitsisumik nalunaarsuineq makkuninnga nassataqarpoq:

- Suliffeqarfinnik nalunaarsorneqarnissamik nammineerlutik kissaateqarlutillu qinnuteqarsimasunik nalunaarsuiffik ataaseq
- Suliffeqarfinnik – niuerfinni nammineq aningaasarsiutigalugu ingerlatap saniatigut - isumaginninnikkut ikiortarialinnik sulisoqarnissamik nammineerlutik toqqaasimasunik nalunaarsuiffik alla.
- Suliniutinik inatsisitigut aalajangersakkanik tunngaveqarluni uppersaasakkanik nalunaarsuiffik
- Suliffeqarfiup namminersortup inuiaqatigiinnut iluaqutaasumik suliniutini ilisarnaasiullugu nittarsaassisinnaaneranut periarfissaq, tassa tunisassioq naapertuuttumik akilerneqarsimaneramik-, akuutissartaqannginnermik-, inuussutissartat pillugit- il.il. ilisarnaatillit naligalugit.

¹ Takuuk: <http://socialvirksomhed.dk/om/socialokonomisk-virksomhed> danskit naalackersuisuisa suliffeqarfiit ikiortarialinnik suliffeqartitsisut siammarterneqarnissaannik suliniuteqarnerat tunngavigalugu nittartagaq taanna pilersinneqarsimavoq.

Illuatungaani suliffeqarfittut tapersersortarialinnik suliffeqartitsisutut nalunaarsorneqarneq makkuninnga nassataqanngilaq:

- Inuiaqatigiinnut iluaqutaasussanik aalajangersimasunik naammassinninnissamik suliffeqarfinnik tamanik imaluunniit suliffeqarfiit namminersortut ilaannik pisussaaffiliineq
- Suliniut unammilleqatigiinnermik equngalersitsisoq, suliffeqarfiit namminersortut ilaannik allanut naleqquillugit pitsaanerusumik inissisimalersitsisoq
- Suliffeqarfiit namminersortut takorluukkatut, anguniagassatut il.il. nalunaarutigisaannut pisortat akulerunnissaat.

Tamanna tunngavigalugu minnerunngitsumillu suliffeqarfinni ataasiakkaani nalunaarsorneqarnerup taamaallaat nammineq piumassutsimik tunngaveqartussaanaera naatsorsuutigineqarmat suliffeqarfittut tapersersortarialinnik suliffeqartitsisutut nalunaarsorneqarsinnaaneq unammilleqatigiinnermik equngalersitsisutut ataatsimiititaliamit nalilerneqanngilaq aalajangersimasunillu salliutitsinerusorineqarani.

4.2 Naalakkersuisut allannguutissatut siunnersuutaat

Ataatsimiititaliap paasivaa Naalakkersuisut siunnersuutip matuma siullermeerneqarnerani allannguutissatut siunnersuummik ima oqaasertalerneqartumik saqqummiussisut:

”Inatsisartut aalajangiiffigisassaattut siunnersuut, Naalakkersuisut pisussaaffilernissaannik Inatsisartut inatsisissaattut siunnersuummik suliaqarnissamik, suliffeqarfiit innuttaasunik ikiortarialinnik suliffissaqartitsisartut nalunaarsorneqartarnissaat pillugu, imaluunniit suliffeqarfiit innuttaasunik ikiortarialinnik suliffissaqartitsisut pillugit nassuiaammik UPA2020-imi saqqummiussequllugit”.

Allannguutissatut siunnersuut suliassanik marlunnik, tamarmik imminnut mattuttunik suliaqarnissamik Naalakkersuisunut pisussaaffiliisoq pineqartoq ataatsimiititaliap maluginiarpaa. Tamatuma malitsigaa Naalakkersuisut allannguutissatut siunnersuutaat akuersissutigineqassappat, Naalakkersuisut:

1. Suliffeqarfittut ikiortarialinnik suliffeqartitsisutut nalunaarsukkat pillugit Inatsisartut inatsisissaattut siunnersuummik suliaqassapput UPA2020-MILU saqqummiullugu.

Imaluunniit:

2. Suliffeqarfiit ikiortarialinnik suliffeqartitsisut pillugit nassuiaammik UPA2020-mi saqqummiussissapput

Inatsisitigut inassisimanermik oqaatigineqartutut allannguineramik taamaattumik pisariaqartitsisoqarnera pillugu misissueqjissaartoqartinnagu inatsisissatut siunnersuummik

saqqummiussisoqannginnissaa ataatsimiititaliamit tunngaviatigut taperserpeqarpoq. Misissueqqissaarnerni taamaattuni akuusunik attuumassuteqartunik tamatigut peqataatitsisoqartariaqarpoq, soorlu oqartussaasunik pisortatigullu suliaasaqarfinnik allanik, matumanili aamma inuussutissarsiortunik namminersortunik.

Suliffeqarfittut tapersersortarialinnik suliffeqartitsisutut nalunaarsukkat pillugit inatsisissatut siunnersuummik saqqummiussinissaq Naalakkersuisut toqqarpassuk arlaatigut piareersaateqarnissaq naatsorsuutigineqartariaqassaaq – suliaassarlu taannarpiaavoq nassuiaatip siunnersuutigineqartup imarisariaqagaa. Ilaatigut tusarniaanissat inatsisilerinikkullu misissuinissaq eqqarsaatigalugit misissueqqissaarneq taaneqartoq, naggataanut inatsisissatut siunnersuummik saqqummiussisoqarneranik kinguneqassaguni 2019-imi ukiakkut naammassineqareersimassaaq. Tamatuma nassatarisariaqarpaa Naalakkersuisut nassuiaammik qulaani imm. 2-mi taaneqartumik UKA2019-imi naammassinnereertariaqarnerat, taamaangippammi imm. 1, naammassineqarsinnaassanngilaq.

3. Siunnersuutip aningaasaqarnikkut kingunissai

Aalajangiiffigisassatut siunnersuutip piviusunngortinneqarnerata aningaasaqarnikkut allaffissornikkullu kingunissai Inatsisartut suleriaasianni §33, imm. 1 malillugu siunnersuummut tunngavilersuutini allaaserineqarsimassapput.

Siunnersuutip piviusunngortinneqarnerani aningaasaqarnikkut kingunissai siunnersuummi allaaserineqarsimasut ataatsimiititaliamit maluginiarneqarpoq. Taamaalilluni siunnersuutaaqqaartumik akuersissutiginninneq inatsisilerinikkut piareersaateqarnermut AC-p ukiumut ataatsimut akissarsiaanik naleqartussatut siunnersuuteqartumit nalilerneqarpoq, tassa 500.0000 kr.-inik. Tamatuminnga allaanerusumik naliliinissaminut ataatsimiititaliaq tunngavissarsinngilaq, soorluttaaq inuussutissarsiortunut namminersortunut kingunissat pillugit kiisalu pisortat, suliffeqarfinnut tapersersortarialinnik suliffeqartitsisuusinnaasunut sunniutigisaannik siunnersuuteqartup allaaserinnissimanera ataatsimiititaliap maluginiaraa. Ataatsimiititaliaq tamatuma saniatigut siunnersuummik matuminnga qulaani suliarinninnermut innersuussissaaq.

Allannguutissatut siunnersuummik akuersissutiginnissinnaanerup aningaasaqarnikkut allaffissornikkullu kingunerisinnaasai pillugit naatsorsuutigisanik nutaanik Naalakkersuisut saqqummiussisimangillat. Sammisami nutaami inatsimmik piareersaateqarnermi suliarineqartussatut nalinginnaasumik naatsorsuutigineqartartunik nassuiaatip oqaatigineqartup imaqarnissaa ataatsimiititaliamit naatsorsuutigineqarpoq. Taamaattorli nassuiaammik piareersaateqarluni suliaqarnermi naqiterisitsinnaanerumut tamanullu saqqummiussinermut saniatigut aningaasartuuteqartoqarsinnaavoq.

4. Ataatsimiititaliap inassuteqaatai


Ataatsimiititaliami **amerlanerussuteqartut** Inuit Ataqatigiinneersut, Demokraatineersut kiisalu Suleqatigiissitsisuneersut **siunnersuutaaqqaartup akuersissutigineqarnissaa** inaassutigaat.

Ataatsimiititaliami **ikinnerussuteqartut** Siumumeersut **Naalakkersuisut allannguutissatut siunnersuutaat akuersissutigineqarnissaa** inaassutigaat.


Ataatsimiititaliap taama oqaaseqaateqarluni isumaliutissiisummilu allassimaneratut paasinnilluni siunnersuut aappassaaniigassanngortippaa.



Jens Danielsen
Siulittaasoq




Múte B. Egede
Siulittaasup tullia




Mala H. Kúko



Henrik Fleischer



Randi V. Evaldsen



Peter Olsen



Tillie Martinussen